

四庫全書

集部

欽定四庫全書

集部

呂衡州集卷

五至十

詳校官監察御史_臣邱文愷

檢討_臣何思鈞覆勘

總校官編修_臣王燕緒

校對官主事_臣陸湘

謄錄監生_臣印鴻翥

欽定四庫全書

呂衡州集卷五

唐 呂溫 撰

表狀

代李侍郎賀收西川表

臣某言伏見高崇文奏以九月二十一日官軍入成都
府逆賊劉闢走出見勒兵追捕者臣聞夏震秋落乃觀
成物之功善陣有征方見勝殘之禮然則殺之所以生

之也動之所以綏之也氣和則歲功早就德勝則廟算
先期無遺鏃而巨寇窮奔不血刃而全蜀底定奔走夷
裔歌舞生靈騰瑞氣而躍祥風披慶霄而捧白日

中賀

伏以陛下纂臨宸極惟新庶政拓跡開統之始作法定
制之初而賊闢敢犯天威首干大紀恃險與遠窮兇極
惡雖禍淫助順誠天道之必然而制勝舉全皆聖謨之
自出一昨諸軍既集鋒鏑爭先陛下以為方暑用兵觸
冒害氣與勦人而欲速寧全衆而功遲遂令緩螻蟻之

誅抑貔貅之銳休養磨礪以須秋期由是感恩而思奮
者萬心如一又高崇文疾惡太甚然傷小過陛下推弔
伐之義弘覆幬之慈寇逆是誅吾人何罪遂令逐北者
生致為上脅從者獲則免之且諭鴻私仍加安慰由是
飲澤而同化者十室而九加以聖慈曲被大信有孚當
挾纊之時賜戰士悉出內府開食椹之路賞降者曾不
踰晨遂使昏迷革心義勇增氣江山自拔雷雨長驅渠
魁假息而逃威士衆順風而捨杖市不易肆巷無驚犬

人蒙骨肉戶解倒懸旌旗導長養之風金鼓動發生之
氣然後知至仁能殺睿略無方大典用彰神武可慰全
苞形氣之內有罪必誅旁行天地之間無思不服臣謬
膺重寄親奉昌期坐觀氛祲之清日覩鯨鯢之戮手舞
足蹈倍萬恒情

代李侍郎謝內庫錢充軍資表

臣某言今月十三日面奉進旨其南郊賞設錢恐度支
支計闕少以內庫錢充者臣聞王者以四海為家居道

惟百姓與足象天平施而無別如地生財而不私薄奉
已而厚奉公重從人而輕從欲知則孔易行之惟艱曠
代莫聞今日斯遇伏惟皇帝陛下誕膺駿命富有萬邦
而能寶玄元慈儉之宗奉列聖憂勤之緒臣謬思禹貢
竊見堯心非戎祀之用無急宣非軌物之經無別獻土
木之功遂聞於廢息恩幸之賜殆絕於霑濡固已行路
謳吟搢紳忤歎者久矣伏以郊裡有日慶澤自天楚師
思挾纘之恩漢將望解衣之惠國存舊典事有恒規在

臣職司敢不供集陛下憐江淮甫罹旱歉念庸蜀新罷大兵雖經費有餘而聖慮猶軫昨因伏奏親奉德音悉擬發內府金錢御服繒綵約躬節用紓國贍軍允協師和虔恭祀事必知感神人之德未酌獻而幽通動天地之誠先燎烟而上達百祥所降萬福攸宜信可以光洽寰區負掩圖篆家知自遂戶識至公風人寢杼軸之詩黔首臻富庶之域微臣何幸獲覩升平至德難名載深感躍無任喜忭激切之至謹奉表陳謝以聞

代賀瑞雪表

臣某言臣聞周陳洪範王者之首政惟農魯作春秋國
家之大事在祀農憂旱之為虐祀戒雨之失時亦由聖
感節宣孰云冥數前定臣伏見比者冬陽愆候宿麥未
滋陛下減膳撤懸晨興夕惕加以郊禋日近輦路飛塵
竊慮增軫聖情微昏羽衛帝誠神應人欲天從果得風
雨叶期陰明若契每至乘輿就次御幄寧居然後助澄
掃於前驅効霑潤於清道及夫廟廷金奏則橫漢昭回

壇墀烟升則纖蘿不動從容成禮鼓吹還宮御正陽之
門施作解之令歡呼夷夏踴躍生靈三代之備物克終
百王之能事斯畢神休坐降瑞氣潛蒸玉鸞僅輟其行
音素雪已飛於前殿盈天表慶成花効竒洽萬國之歡
心啟千載之昌運若非孝踰舜德勤過堯心則何以禮
一接而幽報隨彰景未移而明徵遽至上辛受福獻歲
告豐天地迴動於精誠陰陽變化於宸念始悟竹宮望
拜徒神無用之光交門作歌乃為語怪之事臣謬膺重

任獲侍嚴祠嘉候殊祥愜心在目受恩既深於庶類同
休豈止於恒情手之足之罔知攸措無任感躍屏營之
至

代賀生擒李錡表

臣某言臣得某官某乙狀報伏承今月十三日夜浙西
將士張子良等相率效順生擒李錡者天討有罪國無
稽誅夷夏同歡飛沉咸躍

中賀

臣聞養氣方蒸伏陰不

能藏其源必疑戰發洩以彰正陽之功至化方融大姦

無敢隱其慝必凌犯誅夷以耀聖人之武殄不盡消生
德不遂姦不盡發聖功不成蓋自然之明徵而必至之
恒理伏惟皇帝陛下光膺駿命恢纂鴻休仁育羣生義
征不憚無與讓而誕修文德不得已而有此武功日者
周歲之間大刑再舉朔陞叛將獻首於九廟之庭益部
兇渠伏鑕於萬人之目被髮左衽且猶知懼肖形含氣
孰不革心賊錡身齒人倫家承宗籍三朝任遇五族輝
光而獨藏禍謀密聚奸黨梟林之牙旗尚在忽已發狂

戮闢之刃血未乾敢茲拒命陛下重難戎事深愍遠人
先示招諭後加討伐方伯嚴兵有司調食經畧纔下形
勢已張果得義勇協心鬼神假手大旆迴指長戟合圍
兵火之氣天連金鼓之聲海震曾不終夜遂擒元兇巷
有居人市無改肆滔天之逆踰月而平去歲西征則善
陣不戰今茲東伐則善師不陣有以見睿畧天縱神武
日新聖道久而投刃皆虛德澤深而用力彌寡從此灾
窮殄盡俗變風移百蠻成冠帶之鄉五兵為耒耜之器

溥天同軌比屋可封古今一時堯舜何遠臣謬膺重寄
特荷殊恩再逢河海之清三覩鯨鯢之戮志深除惡義
切同休歡忭之誠倍萬恒品無任手舞足蹈之至謹奉
表陳賀以聞

代武相公謝槍旗器甲鞍馬表

臣某言今日中使某乙至臣宅奉宣聖旨賜臣槍旗甲
器鞍馬錦綵等禮殊其數物備其容肅以將威煥以昭
寵雲澤濡體天光照門忭駭失圖兢惶罔據臣某誠荷

誠感頓首頓首臣才不可取進不因人陛下憐其小心
知其盡節特紆宸睠而謬委台司匡補之益無聞將明
之効靡著方俟嚴譴忽蒙殊恩寄重西南任兼中外封
開大郡秩正黃樞登壇於六符之階被袞為三軍之帥
古今盛典盡在茲日人臣富貴舉集微躬豈臣孱弱所
克負荷非臣殞越所能上報重錦名馬玄甲朱旗王事
靡盬儼有行色天顏咫尺忽當遠離感戀彷徨拜受涕
咽折衝分閭媿非式遏之才榮耀自天猥辱專征之賜

無任感恩激切之至謹奉表陳謝以聞

代武相公謝借飛龍馬表

臣某言伏蒙聖慈借飛龍馬若干匹至京兆府界首者
臣謬處台司將明無効自忝方任恩禮特加獎諭綢繆
寵錫輝煥寒衣病藥悉出聖慈匹馬一人咸經御選遠
覽圖史近徵耳目如臣蒙幸未見其倫實有何功敢當
斯遇盡節竭誠在臣子之本分殺身致命報君親之常
道竟將何力上答殊私空保丹誠以致灰粉王程靡處

天駟言旋仰服阜之有期恨違顏之方始精魂自越顧
步莫留權奇之姿向雲闕以獨去悃款之戀與星彩而
共馳瞻望天庭罔知所措無任感戴彷徨之至謹奉表
陳謝以聞

代張侍郎起居表

臣某言孟秋尚熱伏惟聖躬萬福臣以去月二十一日
到薄寒山見蕃胡尚綺里徐等固令盈珍等却迴奏事
今臣取今月發赴衙帳者伏惟聖澤柔遠皇明燭幽蕃

情大歡酋帥知感虔奉朝旨賓禮使臣迎勞肅恭饋餽
豐潔益明嚮化彌表革心臣恭備單車不勝慶忭嚴程
方始絕域未窮白日在天瞻仰如近青蒲之地黃雲覆
塞欣歡無殊丹鳳之城無任犬馬屏營之至謹因中使
奉表稱賀恭祝起居以聞

代伊僕射謝男宥授安州刺史表

臣慎言伏奉某月日制書授臣男宥安州刺史兼侍御
史充武昌軍兵馬留後仍賜紫金魚袋者雷驚里巷日

照閨門寵命自天戰跼無地臣誠懼誠感頓首頓首臣
聞惟君任臣固無虛授知子者父敢私不才臣頃者伏
以聖政惟新時清無事遂絕指縱之望求申戀主之誠
陛下以臣所統歲深周旋艱險長三軍之子弟積百戰
之瘡痍將有去留念其情義理資感勵事貴便安爰勅
臣男試總戎務臣雖訓之以義教之以忠而朽鈍有涯
策磨靡及童子代斲每懷傷手之憂小兒在邊曾無折
屐之喜將何遽膺寵命荐沐恩光直授竹符就加金組

且祁午之為軍尉父已懸車陸抗之將父兵子非綵服
豈比臣身居端右男領方州鳴玉會朝朱轡行樂焜燿
中外冠超古今名教之樂何如人臣之事斯極千載至
公之運獨被殊私萬物咸遂之辰先蒙曲澤瀝肝呈膽
莫盡微誠毀族滅名寧足上報臣無任感恩殞越之至
謹奉表陳謝以聞

道州刺史謝上表

臣某言臣去十月十七日蒙恩授使持節道州諸軍事

守道州刺史奉命星馳不敢遑息以今月七日到州上
訖祇寵自天戰跼無地臣某誠兢誠感頓首頓首臣謬
以孱庸早忝朝序再塵憲府三踐文昌竟不能著稱彌
綸贊肅綱紀合行殿黜翻蒙獎任共至公之理分子物
之憂自古審官莫斯為重臣才乏吏用識昧政經將何
以克副聖心撫寧遐俗唯當勤宣皇化虔奉彝章苦節
勵精少酬萬一臣無任受恩感激之至謹奉表陳謝以
聞

賀冊皇太子表

臣某言伏見十月十二日勅伏承皇太子以四月二十一日冊命禮畢光紹前典惟懷永圖神人允諧動植咸賴臣某誠歡誠忭頓首頓首臣聞燕翼貽謀帝王之大孝立嫡主器禮易之明訓伏惟皇帝陛下克明駿德恢纂鴻休武功有成文理既定然後弘三王之教諭建萬國之元良凡在生靈孰不慶幸臣守官荒服稱賀無階竊忭嶺隅倍萬恒品無任感悅屏營之至謹奉表陳賀

以聞

衡州刺史謝上表

臣某言伏奉五月十一日恩制授臣使持節衡州諸軍事守衡州刺史散官勲賜如故謹以七月十五日到本州上訖恭承寵命循顧庸虛感抃失圖戰跼無地臣某誠感誠懼頓首頓首臣聞三載陟明虞書盛典六條舉最漢制宏規必在上允帝俞諧師錫臣謬領郡務素無吏能虔守國章布宣皇化匪寧夙夜再換炎涼仰奉

陛下憂勤以恤遠人凋瘵雖檢身肅下不敢愧於神明而阜俗移風竟未彰於績用將何以特膺睿獎簡在宸心當愷悌之旁求辱循良之盛選省躬增惕殞首知慙謹當罄竭精誠策磨朽鈍庶立日新之効少酬天覆之恩實望聖慈照臣肝膽臣無任感躍屏營之至謹差某官某乙奉表陳謝以聞

代鄭南海謝上表

臣某言臣自違離闕庭晨夜奔涉祇承寵命不敢遑寧

謹以某月某日到所部上訖奉宣聖旨親諭遠人酬恩
之効未期戀主之誠已積臣某誠感誠懼頓首頓首臣
本章句諸生器用無取徒以小心畏敬謬為先聖所知
趨奉禁闈寢踰星紀屬內外危疑之際是非剖判之初
實以堅貞自持中立無倚天高聽近愚歛獲申神幽鑒
明昌期斯屬遂蒙陛下擢於侍從超冠等倫用其憂國
之寸心委以代天之重務俯俸三命炎涼五周登車奏
馭朽之懷假昧感宵衣之志徒耗神用莫能將明篋盈

謗而方賜駉鼎折足而未忘簪履竟以陳乞遂其優
容無綺季黃夏之德而猥當調護無實融賈復之勞而
獲奉朝請以此沒齒猶為負恩豈意曾未踰年忽蒙抽
獎廟授鈇鉞庭賜旌旗俾臣懦夫當此大任節制五嶺
幅員萬里伏波之銅柱猶在永謝奇功士燮之鼓吹日
聞彌慙武幹將何以宣美皇化振揚國威洗愆責於千
齡答生成於再造唯當奉章修法苦節清心撫獷俗而
思柔酌貪泉而無懼庶幾萬一仰副憂勤但以白日在

天長安不見丹涯限地溟海方深顧蒲柳之前哀奉軒
墀而尚遠無任感戀屏營之至謹差某官某奉表陳謝
以聞

代都監使奏吐蕃事宜狀

右臣前月十四日至清水縣西吐蕃舍人郭至崇來迎
便請將書詔先去臣以二十一日到薄寒山西去蕃帥
帳幕二十餘里停止至二十三日方見尚綺里徐撥布
論乞心熱奉宣進止兼付賜物莫不祇奉聖恩感悅過

望部落歡抃道路謳歌加以接待殷勤供擬豐厚竭誠
歸化形狀可知臣親觀蕃情不勝慶躍綺里徐等固欲
令臣與薛伍領蕃使却歸奏事臣當時苦爭請赴衙帳
自辰及午意竟不移今日再見懇論盡詞往復勢既難
拒恐失事宜即於今月五日令臣與張荐分背便發徬
徨中路憂懼實深心魂震驚進退無據謹勒某官某乙
陳奏以聞謹奏

代伊僕射奏請女正度狀

光祿大夫尚書右僕射南充郡王臣女請度尼某乙右
臣伏以陛下降誕之辰率土蒙幸臣於含氣之內受恩
獨深思所以稱慶南山獻心北極遂割骨肉之愛俾歸
岑寂之門結幽願於金仙奉勝因於寶壽冒昧上請精
誠匪他陛下以釐革初行渙汗無反憐臣罄至之分事
與恩違念臣愚魯之忠貸於法外特降中使俯加慰諭
臣忝居端右之地首干畫一之文誠雖奉上義乖率下
合當嚴譴忽被殊私震驚失圖慙跼罔據荷降鑒之明

原情斯在蒙曲全之澤為感則深輕瀆宸嚴伏增殞越
謹表

代鄭相公謝賜戟狀

門戟十二竿右今日中使某乙至臣私第奏宣聖旨賜
臣前件戟者臣伏以國朝之制名器尤慎吏考三十始
秩銀青戰勲十二乃號柱國必資具美方錫殊榮於是
有命服以朝加戟於戶將勸勞而責實亦馭貴而崇名
上無謬恩下不虛受臣迹非奇致擢自諸生先皇以廉

謹賜知密勿踰於一紀陛下以勤憂過聽委遇首於羣
僚叨據樞衡亟移星歲雷霆用武曾無犬馬之勞日月
垂文豈有螢燭之助徒以侍祠清廟拜壽鴻名累逢慶
賚驟假勲秩禮異其數物盛其容新其閑閣賜之榮戟
衡門燕雀乍相賀於朱楹武庫龍蛇忽追飛於陋巷焜
耀當代寵靈自天聚族知慙殺身匪報無任荷懼屏營
之至謹奉狀陳謝以聞

代鄭相公請刪定施行六典開元禮狀

右臣聞化人成俗莫大乎禮樂垂統建中必資於制度
然而忠敬有弊質文異數羣儒之得失蜂起歷代之沿
革絲棼或榮古而漏今名實交喪或違經而便事本末
相忘或煩褻以為詳或潤略以為要未聞折衷以叶通
方國家與天惟新政物視聽太宗拯焚溺之餘粗立統
紀玄宗承富庶之後方暇論思爰勅宰臣將明睿旨集
儒賢於別殿考古訓於祕文以論材審官之法作大唐
六典三十卷以道德齊禮之方作開元新禮一百五十

卷網羅遺逸芟翦奇邪亘百代以傍通立一王之定制
草奏三復祇令宣示中外星周六紀未有明詔施行遂
使祭喪冠婚家猶異禮等威名分官靡成規不時裁正
貽弊方遠伏惟睿聖文武皇帝陛下恢纂鴻業允升大
猷雷霆奮有截之威日月廓無私之照三叛就戮四夷
來賓牛馬散於農郊兵革藏於武庫嚴禋上帝祇受鴻
名惟懷永圖不自滿假昧爽聽政子夜觀書處成功而
弗休求至理若不及每懷經始則知貞觀之難言念持

盈思復開元之盛臣謬忝樞務兼掌圖籍無能匡補已負於恩私有所發明豈先於典禮伏見前件開元禮六典等先朝所制鬱而未用奉揚遺美允屬欽明然或損益之間討論未盡或弛張之間宜稱不同將遺永代之規必候不刊之妙臣請於常參官內選學藝優深理識通敏者三五人就集賢院各盡異同量加刪定然後冀紓睿覽特降德音明下有司著為恒式使公私共守貴賤遵行苟有僭忒必正刑憲如此則職官有制將興濟

濟之詩風俗大同坐致熙熙之詠見可而獻知無不為
輒瀆宸嚴伏增隕越謹狀

故博陵崔公行狀

曾祖諱承福皇朝大中大夫廣越二府都督

祖諱先意皇朝朝議大夫鄧州刺史

父諱嶽皇朝朝議大夫鄭州長史贈散騎常侍

狀

斧藻天理立為人極敬終端本彼所以將就誠明褒歿

勸存此所以砥礪名教然而以道行已晦而彌光大君子之行也以法考行直而無黨賢有司之職也且曰獻狀則唯所知公清莊而和博厚而敏岐嶷而夙茂羈紲而老成性約情克靜專動直出入孝悌周旋忠信始以經明上第調佐夏陽次以詞麗甲科超尉王屋事迫於官而舉言迫於事而揚欲藏智而蒙滯來求不近名而聲華見逼故相左僕射張公時尹洛京首得才實洎鎮荆蜀致於幕府再兼理官專領記室健筆良畫二邦有

聞旋遘內艱毀瘠僅立善居得禮族黨稱之免喪之歲
天子南狩太尉西平王大會兵車將圖匡復公首膺辟
任濬發義心琴未成聲履及於路感激而將星芒怒謀
謨而兵祲廓清翠華既還優典斯及拜殿中侍御史時
有寵臣為京兆者政以暴聞吏有冤弊公表陳枉直伏
閣待旦言忠主悟事寢風生以繩違稱職轉侍御史以
求瘼慎選為華原令大兵之後旱歲為虐公勞徠不倦
弛張以宜復流庸於潤屋闢曠土為多稼俄改歙州刺

史地雜甌駱號為難理下車而簡其約束期月而明其
信誓然後破散谿聚翦除山豪既去害羣之奸遂寧挺
險之俗徵拜長安縣令威聲先路不肅而理鉅刃餘地
所投皆虛擢同州刺史國歉於豐量賑為糴號里巷者
三百所而凶年備矣戒以暴骸諭之速朽成薄葬者九
百家而奢俗懲矣都人有豪奪鄉悖陰持吏失朋構訟
獄累政所患公斷以尋斧破其囊橐人樂其殺而法制
行焉郡城自禦寇之餘復隍殆盡朝貢所經夷夏何仰

公悅使襁負大興版築下不知役而扁固立焉其餘則去
思有碑詳在篆述可覆視也朝議陟明遷於陝服封介
晉楚寄分函洛而戒備不修兵庫虛閉公乃鳩工以利
器閱實以練卒金革中度義勇知方既而有淮西之役
晨令暮具凜然而可觀矣河出城下造舟為梁經始匪
工敗決相繼公乃沉石而雙固中泚省艦而三分巨渠
水與意會勢若天成既有奔濤之沴智勝功顯終然
而無害矣其餘則三降璽書就加爵秩是明徵也移疾

入覲貳職冬官歸載不過圖書留府盈乎粟帛豐公約私於是乎在至既陳乞以尚書致政室不交要路之賓口不言當代之事就陰委順談者多之公自解巾至於撤樂思不踰矩動不越思以忠貞為仕模以勤儉為家訓身居侯邸清節如初男降王姬素風愈厲羈孤聚室人各忘其亡布褐分庭士不知其貴體溫柔而事至能斷性坦易而物莫能窺當官不務其名聲所去必遺其功利吐謠尚在時論可徵已踰書葬之期請舉易名之

典謹狀元和三年四月日故銀青光祿大夫守工部尚書致仕贈陝州大都督博陵崔公外生甥朝議郎司封員外郎上騎都尉賜緋魚袋呂溫謹上

欽定四庫全書

呂衡州集
卷五

二十

呂衡州集卷五

欽定四庫全書

呂衡州集卷六

唐 呂溫 撰

碑銘

三受降城碑銘

并序

夏后氏遏洪水驅龍蛇能禦大菑以活黔首周文王城
朔方逐獫狁能捍大患以安中國若非高岍峻防重門
擊柝雖有盛德曷觀成功然則持璫璣而弛張萬象吳

欽定四庫全書

呂衡州集
卷六

穹之妙用扼勝勢以擒縱八極王者之宏圖道雖無外
權則有備變化消息存乎其人三受降城皇唐之勝勢
者也昔秦不量力北築長城右扼臨洮左馳碣石生人
盡去不足乘障兩漢之後類為荒丘退居河澨歷代莫
進矯亡秦之弊則可矣盡中國之利則未然唐興因循
未暇經啟有拂雲祠者在河之北地形雄坦控扼樞會
虜伏其下以窺域中禱神觀兵然後入寇甲不及擐突
如其來鯨一躍而吞舟虎數步而擇肉塞草落而邊氓

懼河冰堅而羽檄走爰自受命至於中興國無寧歲景
龍二年默啜強暴瀆鄰搆怨掃境西伐漢南空虛朔方
大總管韓國公張仁愿躡機而謀請築三城奪據其地
跨大河以北嚮制胡馬之南牧中宗詔許橫議不撓時唐
休環建於是留及瓜之戍斬姦命之卒六旬雷動三城
議非之

岳立以拂雲祠為中城東西相去各四百里過朝那而
北關斥堠迭望幾二千所省費億計減兵萬人分形以
據同力而守東極於海西窮於天納陰山於寸眸拳大

漠於一掌驚塵飛而烽火耀孤鴈起而刁斗鳴涉河而
南門用晏閉韓公猶以為未也方將建大旆提金鼓馳
神竿鞠虎旅看旄頭明滅與太白進退小則責琛賁受
厥角定保塞一隅之安大則倒狼居竭瀚海空苦寒萬
里之野大畧方運元勲不集天其未使我唐無北顧之
憂乎厥後賢愚迭任工拙異勢剛者黷武柔者敗律城
隳險固寇得凌軼或驅馬飲河而去或控弦劇壘而旋
吾知韓公不瞑目於地下矣今天子誕敷文德茂育羣

生戢兵和親七狄右袵然而軍志有受降如數大易有
安不忘危崇墉言言其可施柝亦宜鎮以元老授之廟
算劇述舊職而恢遺功外勤撫綏內謹經畧使其來不
敢仰視去不敢反顧永讐猛氣無生禍心聳威馴恩安
居荒外安固萬代術何加焉敢勒銘城隅庶復隍而光
烈不昧銘曰

韓侯受命志在朔易北方之強制以全策亘漢橫塞揭
茲雄壁如三鬪龍躍出大澤並分襟帶各閉風雷俯視

陰山仰看昭回一夫登陴萬里洞開日晏秋盡纖塵不
來時惟韓侯方運神妙觀釁則動乃誅乃弔廓乎窮荒
盡日所照天乎未贊不策清廟我聖耀德罷扃北門優
而柔之用息元元曷若完守推亡固存于襄于夷永裕
後昆

故太子少保贈尚書左僕射京兆韋府君神道
碑

山之大者匿峯巒含氣象積高無倪而不見其險孕粹

有物而不知其神此其所以為大也德之全者毀圭方
點皎厲靈機密運而智不驚愚遐操特立而迹無變俗
此其所以為全也然則泰山高而可陟全德近而難知
我求其倫見之於少師公矣公諱某字某京兆杜陵人
其先帝堯光宅讓德儲慶建國命氏列於夏商相胄卿
族繁於漢魏代濟不殞煥為盛門大王父諱某皇朝主
客郎中萊濟商三州刺史王父諱某倉部郎中太原少
尹贈祕書監烈考諱某檢校都官郎中嶺南節度行軍

司馬贈同州刺史或以瑚璉之器纔施郡政或以巖廊之姿僅及戎佐與時俱息從道而污屈不試於當年啟莫京於身後公生而岐嶷弱而老成渾粹不散清明虛映朱絃遺音而宮商自韻大圭不琢而浮彩溢發邈是天爵爛乎人文鼓鐘之聲日遠鄉曲之譽來逼釋褐太子正字與仲弟正卿以賢良偕徵策入異等鴻冥雙舉當代榮之授高陵主簿遷監察御史改殿中內供奉東都留守判官即拜東臺侍御史叅畫惟允持繩不同河

洛之間風聲尚在德宗躬決庶政本於尚書責成曹郎
綜練材實薦出方伯時超貳卿二十年間斯為極選公
由是前後遷刑部吏部員外郎吏部郎中奏議推美彌
綸成績南宮之故事存焉於時戡復日近勲勤者衆都
市惰游盡垂金組邦畿豪奪半賜丹書輕禽逸於疎網
悍馬駭於柔轡上思懲抑必俟良能公由是前後歷奉
天長安二縣令仁護鰥嫠智鈴豪右輿人之遺詠在焉
望以實濟任以望重選曹未幾遷給事中既居駁正之

司不撓當官之論屬東南歲歉俾人惟艱出為常州刺史天寶之後中原釋耒輦越而衣漕吳而食一隅重困五紀於茲公臨之清貞結以忠恕周給惠寡務嗇勤分一法以去其侵漁多方以備其灾患以逸道而使繕完允濟以與道而取賦入先期聲聞天朝考績連最轉蘇州刺史二境之間百里而近靈源自出殊派同清膏澤所需異壤同潤下車期月報政如初加秩賜金借留累歲無何彭沛喪師兵驕地偪安危所繫朝議難之乃以

公檢校祕書監兼御史中丞賜紫金魚袋充徐泗節度
行軍司馬重其威望將委旄鉞而未命程伯徐方之軌
既同不見賈生宣室之徵遽至擢吏部侍郎倫品甄明
通簡節適勢有探湯之熱我以靜濯衆有鼓簧之喧我
以心聽馴致其美闇然日彰不求無失職之人人自以
為不失職矣召拜京兆尹德刑交修寬猛相濟匪設鉤
距物無遁情匪曜鋒鉞機無滯斷浩穰之理不肅而成
不求無不欺之吏吏自以為不能欺矣俄改太子賓客

辭劇就閒圖南之勢一息選德求舊居東之命惟重遷
檢校工部尚書兼御史大夫充東都留守東都畿汝州
都防禦使自盜起幽陵兵屯諸夏涉淮而北軍國異容
分陝以東古今殊寄公講信修睦外張保釐之政完備
訓戎內寓折衝之令矛戟不露德耀藹然遐邇頓首以
承風強暴革心而知懼今上嗣統就加檢校吏部尚書
方入諧僉屬毗贊大化不幸嬰疾表求退歸優詔除太
子少保冀其休復將有後命神祇竟昧藥禱無降以元

和元年三月十二日薨於東都履信里之私第享年六十有四寵贈尚書左僕射轎車西歸制使賻弔太常褒議謚曰某公哀榮備矣夫人河東裴氏侍中耀卿之孫給事中皋之女德門鍾美淑聞充塞薨榮早落著兆叶期即以是年五月二十一日合葬於萬年縣高平鄉少陵原禮也公孝悌天至行有餘力仁義性德匪俟服膺不飾表以近名恒縱心而中矩清虛簡淡而應物不倦通曠夷易而及門無雜不尚意氣而然諾篤志不好臧

否而鑒識超倫與故相國齊江西映穆宣州贊贊弟侍
御史員為文章道義之友可以視其所親矣今吏部郎
中扶風竇羣抗迹毗陵退身進道公三揖郡榻之上
一振天墀之下不數年間蔚為重器可以視其所舉矣分
正東郊開府辟士則有今右司郎中燉煌段平仲倉部
員外郎安定皇甫鏞禮部員外郎清河張賈權京兆尹
韋嗣隴西李景儉中山衛中行平陽路隨皆羣彥之秀
出一時之高選可以觀其所任矣加以志尚幽遠冥搜

好古所居第必有松石之致退公暇日常以圖籍自娛
一字愜心金玉不顧片言同趣布褐無間疊疊然若見
道之所存陶陶然不知歲之云晏於戲策名從事四十
餘年朋友罕聞得喪之言家人莫見喜愠之色坦懷以
處推分而行無怨於人人亦不怨無猜於物物亦不猜
履信順以優游保福祿而終始其名教之大雅者歟有
子九人長曰元賀前常州義興縣尉次曰穀前邠州司
倉次曰璋鄉貢進士能修詞立誠克家致美茂揚風訓

休有令聞其次某某等皆殊資異識登於童齒慶善之餘也以某獲窺牆仞見託篆述完賢人之業信而無媿申孝子之志直而不文其詞曰

利建於商介圭作寶爰立於漢緇衣改造克昌厥胤奕世載考亞尹擅名郎中懷道莫躋貴仕莫享難老蘊靈儲休以啟少保丕顯少保其德悃悃有悼遐姿曠哉靈襟顯仁山立藏用淵沉煦如冬陽藹若春陰白圭三復克保明心黃鍾九變莫匪和音靜專動直謙退柔克宜

踐公輔以楨王國促路頓軌中天墜翼少陵古原拱樹
寒色黃腸可契唯名不失金石垂之以慰罔極

劉公神道碑

闕

南嶽大師遠公塔銘記

原夫法起於無色生於妄求離於色者未得皆空徇念
於無者斯為有著是以至人心無所念念無所求利未
動而求安本不然而何滅然而利根難植頓詣罕聞不
有舟梁孰弘濟度匪因陞級莫踐堂塗必在極力以持

其善心惠念以奪其浮想不以身率孰為教先誰其弘之則南嶽大師其人也師諱承遠漢州綿竹縣謝氏之子積修妙性宿起冥因乘報現身應期弘道自天鍾美因地稟靈七尺全軀峨岷與瞻敬之狀九漏懸解江漢資清淨之源殊相夙成隱照潛發師甫志學始遊鄉校驚禮樂之陷阱覺詩書之桎梏忽忽不樂未知所逃俄有信士以尊勝真言質疑於學怡然聳聽宛若前聞識契心冥神動意往遂涕決慈顧行徇幽緣初事蜀郡康

禪師禪師學於資州說公說公得於東山弘忍堅林不
盡祕鍵相傳師乃委質僮役服勤星歲旁窺奧旨密悟
真乘既壯遊方沿峽東下開元二十三年至荊州玉泉
寺謁蘭若真和尚荆蠻所奉龍象斯存歷刳方契其幽
求一言懸會於虛受爰從荆毀始備緇錫昂然古貌森
映喬松真公南指衡山俾分法派越洞庭浮沅湘息於
天柱之陽從通相先師受聲聞具戒三乘之經教四分
之紀律八正之倫要六度之根源莫不更贊神機遍歸

心術聞京師有慈敏三藏出在廣州乃不遠重阻星言
覲謁學如不及求所未盡一通心照兩捨言筌敏公曰
如來付受吾徒用弘拯救超然獨善豈曰能仁俾依無
量壽經而修念佛三昧樹功慈劫以濟羣生由是頓息
諸緣專歸一念天寶初歲還於舊山山之西南別立精
舍號彌陀臺焉薙草編茅僅蔽經像居靡童侍室無斗
儲一食不遇則茹草而過弊衲莫充而歲中自若奉持
贊嘆苦劇精至恒於真際靜見大身花座踴於意田寶

月懸於眼界永泰中有高僧法照者越自東吳遊於廬
阜尋遠公教跡結西方道場入觀積旬至想傍達見彌
陀座下有老比丘焉啟問何人答曰南嶽承遠願告吾
土勝緣既結真影來現照公退而驚慕徑陟衡峯一披
雲水之塵宛契定中之見因緣昭晰悲喜流涕遂執摠
衣之敬願承入室之顧大師德因感著道以證光遠近
聆風歸依載路於是大建法宇以從人欲輪奐雲起丹
刻化成走檀記於十方盡莊嚴於五會香花交散鐘梵

相宣火宅之烟焰皆虛慾海之波瀾自定加以寶裝祕
倡建幢於臺前玉篆真文揭碑於路左施隨求之印以
廣銷業累造輪轉之藏以大備教典勸念則徧勝於崖
谷勵學則兼述於縑緗其欲人如身慈惠懇至皆此類
也大師峯栖木下六十餘年苦節真修老而彌篤夙開
戶牖久啟津途法界之尊重在焉人天之瞻仰如是常
陋處方丈志行平等食不重味寒不兼衣王公之珍服
盈廂毗庶之金錢布地莫不迴修佛事瞻養孤老眷言

施者以是報之期頗將及志力無替中鐘會食到必先
衆夕罄虔念居恒達晨其克已鍊心慎終如始皆此類
也大厯末門人法照辭謁五臺北轅有聲承詔入覲壇
場內殿領袖京邑託法曇之遠蔭自感初因分慧日之
餘光寧忘本照奉陳師德乞降皇恩由是道場有般舟
之號貞元歲某獲分朝寄廉問湘中近照德輝備探衆
妙况靈嶽直午先皇本命宜有上士斯焉護持表求興
崇詔允誠願臺雖舊號其命維新寺由是有彌陀之額

度生二七會供千人中貴巡香守臣視饌瑤圖花捧寶
字烟開寵降九天輝映三界師亦建不壞之塔以壽君
親修無邊之功以福邦國梵王之能事畢矣法門之榮
觀備矣貞元十八年孟秋既望顧命弟子申命教戒掃
室趺坐恬然化滅報齡九十有一僧臘六十有五先是
忽告門人曰國土空曠各宜勉力數月而災火梵宇周
歲而吾師解形此蓋寶去山枯龍移水涸空曠之旨乃
明前知法衆崩慟若壞梁木邦人號赴如失舟航以其

年九月七日遷神於寺之南岡即安靈塔教也前後受
法弟子百有餘人而全得戒珠密傳心印者蓋亦無幾
比丘惠詮知明道偵超然等皆與室之秀者以瞻奉將
遠經行坐蕪永懷宗極見託碑紀移有道於物外真無
愧詞比遺愛於人間誠當墮淚銘曰

浩浩清塵茫茫逝川大雄作矣救物為先明非有照慈
亦無緣不宰功立忘機智全誰其弘之南嶽命代習識
虛受應身圓對理則歸空教惟不昧末搖本靜形苦神

秦雲跡一滅天星六周熱惱就濯童蒙來求攝以靜念
驅之力修我法有戶誰能不由甘露晨晞香雲夕卷彼
岸方濟慈舟忽遠鑪烟如在塔樹勿翦刊勒豐碑永想
正眼

韋公神道碑銘

闕

呂衡州集卷六

欽定四庫全書

呂衡州集卷七

唐 呂溫 撰

誌 銘

鄭夫人墓誌銘

闕

大長公主墓誌銘

闕

李夫人墓誌銘

闕

柳夫人墓誌銘

闕

陳先生墓表

有唐貞晦先生廣陵郡棠邑鄉陳君曰融無字享年七十有二遊不出鄉考終厥命嗚呼至哉良玉雖白不受采醴泉自甘非有和貞色鎮密丹素無自入也靈味天成麴蘖無所資也故先生長而不學大樸不通於輪轅至音不諧乎宮商曲直渾成巧匠莫能材也清濁一致伶倫莫能器也故先生老而不仕地虛而踐則有跡器疎而扣則成聲我踐惟實跡不可得而見也我扣惟密

聲不可得而聞也故先生沒而不稱若夫為養克孝居喪致毀事亡如存朋友孜孜兄弟怡怡於鄉恂恂與物熙熙天性人道其盡於茲何必讀書然後為學知命是達怡神為榮樂天忘憂自寵不驚貴我以道此非祿乎何必入官然後為仕我有信順自天祐之謂天蓋高亦既知矣謂神蓋幽亦既聞矣何必俗聲然後為名大哉先生行不學之道據不仕之貴負不稱之名達人觀焉斯亦極矣予貞元初寓居是邑言歸京國道出其鄉始

見一鄉之人父義子孝長惠幼敬見乎詞氣發乎顏色
不聞忿爭之聲不見傲慢之容雍雍穆穆甚足異也因
揣之而嘆曰芳蘭所生其草皆香美玉所積其山有光
此鄉之人豈必盡仁其必有賢者生於是矣遂停車累
日周訪故老果曰吾里嘗有陳融孝慈仁信不學不仕
鄉人見也皆自欲遷善遠罪亦不知其所以然今也則
亡清風猶在予於是慨然痛先生以純德至行沉落光
耀官闕軾廬之禮士無表墓之文知而不書我孰其咎

乃披典校德謚曰貞晦處士窮徵其實建石於路用告
將來之有識者云爾貞元五年秋八月東平呂某述

呂府君權殯記

闕

呂衡州集卷七

欽定四庫全書

呂衡州集卷八

唐 呂溫 撰

銘 文

傅巖銘 并序

昔殷高宗恭默思道至誠動天天將報之以說為瑞王
在於寢降神夢中審形旁求實得於此曾不待敷奏以
言明試以功脫刑人之衣便被公衮授受之際君不疑

臣不慙大哉邈乎殷之所以興也若非武丁之心周乎
天地傳說之德通乎神明何感動訢合如此其易厥後
唯文王以兆用太公自漁父而登國師白旄一麾光宅
天下抑其鄰歟由茲而還莫不先顯後幽右資左德勒
以漢秩束於周行使特達自致之士無聞焉吁可嘆也
夫以天驥之材而造父御之則必翼輕軒凌高衢風翔
電邁一日千里若制非其人服非其車忘權奇務牽束
挫盛氣頓逸足使遵乎尋常之躡則終歲疾驅望駕胎

而不及矣遇與不過又何疑哉嗚呼見賢非難知之難
知之非難用之難用之非難特達難君人者苟以特達
為心假無殷宗之夢必自得說不然則雖使咎夔稷契
盡入其庭亦葉公之見龍反疑懼矣况氤氲之中乎恍
忽之際乎貞元九年予自鎬徂洛息駕於虞虢之間升
虛瞰原髣髴其地遠跡雖昧清風若存想說命三篇幾
墜秦火百代之後德音如何乃作銘曰

赫赫湯德如火不滅滔滔商祚如海不竭發祥播氣世

金史卷八十八
作聖哲國誕武丁野生傳說說始胥靡武丁即祚德通
神交忽夢如悟若帝導我期於顓素有無之間邂逅相
遇宵衣而起爰得其人貌符心冥如舊君臣飛龍在天
山川出雲感激自致其間無因捨築傅巖脫鱗鵬程作
霖時和奮檝川澄金在吾礪木從吾繩君何言哉殷道
中興元凱攀堯微舜何階阿衡於湯抱鼎徘徊會合之
際厥惟艱哉何如夢中天授神開惟賢是登道貴特達
匪次易用才其壅遏高宗得說乃在恍惚揭銘摘光萬

古不沒

望思臺銘

并序

望思臺者漢武帝思戾太子之所建也事具漢書夫立人之道本乎性情生而知曰性感而動曰情性雖生情情或滅性是以聖人患其然而為之節誠而明之中而庸之建以大倫統以至順倫莫極於父子順莫先於慈孝然而全之者正也慈不得其正則失子孝不得其正則失親救失之術存乎善教昔者三王之教世子也如

周公乃為太傅如召公乃為太保如太公乃為太師左右前後罔非端士禮以專其目樂以一其耳仁以制其氣義以凝其情故匪僻之心無自入也讒慝之口莫能間也父子君臣之道所以全也漢則不然世子非三代之賢保傅無二南之老左右前後惟刑餘罪人目流於靡慢耳溺於恣慝氣溢於寵渥情蕩於驕奢於是匪僻之心得以入矣讒慝之口得以間矣父子君臣之道所以離矣向使太子師友端嚴左右端肅雖江充之詐敢

以不義而加之耶向使太子孝德彰聞仁聲茂著雖武帝之惑豈遽以大逆而疑之耶向使太子早服師訓少知教義豈忍以一朝之忿棄其親而忘其身耶由是言之其所以陷於此者漸矣殆哉當時之勢也國亡冢嗣武老昭弱京師喋血天下疑動若無霍光受負圖之寄秉不奪之節斥昏建明鎮翊洪業則必庶孽尋戈起商參之禍姦臣乘釁行羿浞之事漢家之厄豈及三七哉此有社稷者之所宜深戒也乙亥歲予經於湖登茲荒

臺望古太息以為過夫一物有可以正訓於世者秉筆之士未嘗闕焉乃作銘曰

人倫大統天性是寶雖曰自然亦資黼藻漢皇父子一失其道四海為家不能相保荒臺歸而千古之悲悔目不斷冤魂不歸疑生於微禍積於基苟有明義誰其間之嗣維邦本本動邦危於戲後王鑒茲在茲

古東周城銘

并序

魯昭公三十二年周襄王合諸侯之大夫城成周衛彪

僕曰天之所壞不可支也萇叔違天必受其咎異歲周人殺萇弘左氏明徵以為世規俾持顛之臣沮其勝氣非所以厲尊王垂大訓也予經其地而作是銘

文武受命肇興西土周公作洛始會風雨居中正本拓統開祚盛則駿奔衰則夾輔平王東遷九鼎日輕二伯之後時無義聲大夫萇弘言抗其傾坐召諸侯廓崇王城雖微遠猷實被令名宜福而禍何傷於明立臣之本委質定分為仁不卜臨義不問無天無神唯道是信國

危必扶國威必振求而不獲乃以身殉興亡治亂在德
非運罪之違天不可以訓升墟覽古慨焉遐憤勒銘頽
隅以勸大順

成臯銘

茫茫大野萬邦錯峙惟王守國設險於此呀谷成塹崇
巔若壘勢軼赤霄氣吞千里洪河在下太室旁倚崗盤
嶺蹙虎伏龍起鑱天中區控地西鄙出必由戶入皆同
軌拒昏納明閉亂開治昔在秦亡雷雨晦冥劉項分險

扼喉而爭漢飛錫京羽斬東城德有厚薄此山無情維
唐初興時未大同王於東征烈火順風乘高建瓴擒建
係充奄有天下斯焉定功二百年間大朴既還周道如
砥成皋不闕順至則平逆者惟艱敢跡成敗勒銘孱顏

謁舜廟文

唐貞元十一年歲次乙亥十一月一日東平呂某敢盥
沐齋潔敬謁於帝舜之神恭惟至仁無方大孝不匱德
馨升聞允釐百揆以聖授聖猶言歷試擇人之君良不

可易聖功無金相待而宣雷驅四凶雲起八元火治陶
世璿璣轉天垂衣巖廊萬物浩然是稱至理是曰帝者
混成雍熙永錫大嘏乃眷南顧蒼梧之野歸堯鴻名付
禹天下茫茫推遷邈萬斯年三代之後誰為聖賢政如
頽波俗若壞山韶樂猶在薰風不還於戲道有通變事
有同異官帝家王隨時之義揖讓而禪故非力致所以
識者存而不議若輔相之宜裁成之規煥乎文章百代
可知九官惟舊七政有彛弘道在人太平無時如何後

王曾莫是思甚易甚簡捨而弗為歷山歸然河水東注
唐虞日遠揚墨誰拒瞻彼清廟薄言往訴庶幾精誠必
我依據俾躍清源俾飛曾雲神行之道以致吾君不然
歸來鳥獸為羣敢竭微志託於神明

華山下酌王景畧文

唐貞元十二年十一月六日河東男子呂某敬酌於符
秦丞相王公景畧之墓昔馬氏暴興世不及三拔根河
洛遺枿東南鋸牙霆聲爭逐婪婪天下為血晉猶清談

帝命景畧被茲文武秉心無競用則為主惟秦悼世求
我草莽振衣投畚起作雷雨雨莫不潤雷莫不震吸涼
吞燕嚼魏含晉海蕩風掃天臨嶽鎮功存生人是曰大
順武功成矣文治定矣晏開太平垂及三紀子也無壽
秦其不祀日沉天昏水竭龍死時更運往道歷消長屹
彼壯骨沉為朽壤烈氣猶在英風可想雲開華山若見
精爽樂毅佐燕功負其名漢猶求後寵號華成曷如夫
子翊運而行廓定八州澤流羣生歷代王者追我聖明

盛德未聞荒墳欲平我來於東稅駕醺酒才何敢望數
亦未偶終其自致窺於戶牖靈魄若存死為冥友

代齊常侍祭樊襄陽文

維年月日某官某以清酌之奠敬祭於故襄陽節度使
右僕射贈司空南陽樊公之靈惟公直方忠厚沉敏肅
給通如川流守若山立精氣方運垂天難哉建中旁求
策名帝聰昌言右掖高步南宮爰膺使選將命序戎信
在言前知行誠中消息具用車書以同寇逼漢南乃佐

戎律偏師靖難全功受鉞兵荒之後政克畫一直繩威
姦柔轡惠物一臨荆門再撫峴陽積德逾紀閭閻然彌彰
天不慤遺人之云亡朝野震悼豈惟一方清永之後獲
同王事相府之舉謬廁公議重以中外綢繆親懿旋觀
全材備歸精義交以義合情由道至循躬雖虛望古無
媿嘗言有德必錫永年元聖是毗大猷於宣擊壤鼓腹
吾將老焉今則已矣誰其問天日月將莖哀榮是備禮
有執紼官無離次闕寢動流哀何可既遥申薄奠歆此

精意嗚呼哀哉尚饗

代宰相祭故齊相公文

維年月日某官某等謹以清酌庶羞之奠敬祭於中書
侍郎平章事太子賓客贈戶部尚書齊公之靈古人所
難有道有時惟公挺生克叶昌期雲引喬幹雷起幽姿
禮義誠衡文章元龜學覩儒興政為吏師金錫遐音玉
立清儀始踐南宮洎叅左掖麾幢符竹禮樂圖籍歲蕤
焜耀出入揚歷晦而逾明虛乃受益爰登大任光贊庶

績棟材斯全鼎味以適道始交泰志惟匪躬方盡嘉猷
以奉時雍疾罷私室寵賓儲宮日冀勿藥再諧至公如
何忽焉降命不融竟孤宸眷誰問蒼穹佑早辱見知深
契風義耽獲同樞近備得純懿珣瑜三阿交代郢則兩
掖聯事氣以正合情由道至視孤有懷慟寢無媿龜兆
叶吉素車東轅喉舌追命股肱殊恩魂留魏闕形返周
原凡我寮舊舉觴以言神聽不昧知余所敦尚饗

祭陸給事文

維貞元元年歲次乙丑十月丙申朔十日乙巳將仕郎
守尚書戶部員外郎賜緋魚袋呂某絜樽疊誠敬祭於
故給事中吳郡陸公之靈嗚呼噫嘻道之難行古人所
悲有時無人有人無時時可人可則命奪之公初負道
年志俱壯已任致君指掌太平德宗旁求始賓明庭拔
乎其倫聿駿有聲實欲以至公大當之心沃明主之心
簡能易知之道大明主之道難得易失怡然退保或黽
勉從事或棲遲却掃二十年間為郎而老嘗言吾雖已

矣道不可已永懷其人見而後死某以弱齡獲謁於公
曠代之見一言而同且曰子非入吾之域入堯舜之域
子非覩吾之興覩宣尼之興良時未來吾老子少異日
河圖出鳳鳥至天子威臨泰階清問理本其能以生人
為重社稷次之之義發吾君聰明躋盛唐於庸熙者子
若不死吾有望焉某也不佞謬納大賢其何以充塞所
知克當斯言姑用紳而書牘而藏傳於子孫為門戶光
旣而各淪風波秦吳索居某非出處迫肩無餘公乃高

翔海郡與道虛徐猶念垂訓研覃厥初作君臣得失之
圖成春秋不刊之書今年太皇繼天元聖在震徽公夕
拜侍講古訓皇王祕寶造膝而進以石投水至誠無朕
討論未竟公則旣病重光昇矣公病不起河海晏而航
楫自隳禮樂作而龜玉先毀與其時而奪其壽吾未知
夫所以嗚呼惜哉某奉使無狀閉留昆夷再換炎涼言
歸未期公方沉痾忘已之危念我否隔發言漣沔以所
著書付子稚兒曰道之將興而父其歸懼不果待寓心

於斯似有明神感公所敷窮荒生還僅及公存綿顛在
牀深堂晝昏舉燭開目握手無言自此及終曾未浹辰
凡曰識者孰堪酸辛況予之情豈云他人涕盡一哀痛
纏百身禮不忘本卜歸江濱躬執薄酌心摧氣堙僅見
期之言可徵平生之志獲申呂氏陸氏休戚惟均魂而
有知歆之聽之嗚呼哀哉尚饗

道州祭百姓鄧助費念文

維元和五年歲次庚寅五月庚子朔七日丙午刺史呂

某遣衙前虞候蔣沼以酒脯之奠告鄧助費念之靈使
君受命牧汝保汝不能庇護使賊孟鸞等敢作不道酷
加殺害是用疚心疾首萬計討擒廉使仁明不貸兇惡
窮泉冤痛今日方申慙念無及潜然泣下故令於汝沒
處陳汝之屍魂而有知歆此告酹嗚呼哀哉

祭候官十七房叔文

維元和五年歲次庚寅九月戊戌朔三日庚子堂妹男
朝議郎使持節衡州諸軍事守衡州刺史上騎都尉賜

鯀魚袋某鄉貢進士讓致祭十七房叔候官府君之靈
私門薄佑終鮮諸父堂從之內唯叔一人少小相依筆
硯同學永言素契情實兼常早表誠言見託身事官孤
力薄卒用無成慙負幽明興言痛咽叔無胤嗣後效何
伸河中大塋禮合葬祔十五房尚寓淮甸時力未并且
於江陵謹議權厝終期通歲異壤同歸皦日在天誓無
二事嗚呼哀哉五湖三湘前歲共入孤舟單旒今日何
之慟訣江津倍增摧慕式具祖奠伏惟尚饗

衡州祭柘里渡溺死百姓文

維元和五年歲次庚寅十月戊辰朔十七日甲申刺史
呂某遣故衙前虞候何防以豚酒之奠致祭於蘇昇陳
墳李寬秦陳甫魯餘之靈爾等五人感余誠信力輸公
稅爭赴先期溪山阻深淫潦暴至不忍欺我忘其險艱
州令未明津渡不謹致此淪逝咎由使君興言流涕痛
念何及聊申薄酌兼致微贈代納殘稅皆余俸錢魂而
有知諒此深意尚饗

呂衡州集卷八

欽定四庫全書

呂衡州集卷九

唐 呂溫 撰

頌 讚

凌烟閣勲臣頌

并序

我二后受成命撫興運轉坤軸撼乾樞鼓元氣而雷域
中騰百川而雨天下雷收雨霽如再開闢蕩焉與太極
同功貞觀十七年太宗以功成理定秉為而不有之道

讓德於祖考推勞於羣臣念匡濟於艱難感風雲於疇昔思所以攄之無窮乃詔有司擬其形容圖畫於凌烟閣者二十有四人蓋象乎二十四氣之佐天昭勲德也昔者舜以九官致理周以十亂返正高皇以三傑作漢光武以二十八將中興若夫錯綜勲賢籠絡今古雄四代而高視者其唯聖唐乎至若唐呂公劉渝公之倫探元符建帝圖首戴神堯舉晉陽而活天下此則大禹之拯溺也魏鄭公以致君為己任諫若不及謇謇左右秉心

宣猷此則咎陶之賜言也虞永興糾合羣儒旁求百代
明備王禮克諧帝樂使我大國煥乎其有文章此則夷
蕩之制作也長孫趙公舉大義除二兇安宗廟定社稷
以振我丕赫無疆之休此則周公之匡救也英衛受天
勇知雄武佐聖鼓行海內麾定四方此則太公之鷹揚
也房杜玄機朗識並運惟幄神發響效謨成天功此則
蕭何之指蹤子房之決勝也尉遲秦程剛毅木訥氣鎮
三軍力崩大敵疋馬孤劍為王前驅此則吳漢之樸忠

賈復之雄勇也其餘皆懷棟殊材黼黻異制儔諸古烈
罔有慙德皇王之際於斯為盛其始也文為經武為緯
智斯作忠斯述其末也大不偏小不過退者全來者達
控而縱之使自用之推而引之使自盡之不設籠檻以
觀遼廓之致不煩韁鎖以極權奇之變執一德而衆力
展懸大信而羣情竭高祖聚之以義太宗用之以道高
宗終之以仁傳聖萬代享其功利此非盛歟此非盛歟
昔陸機表宏為晉人而歌功於漢魏作者猶或稱之况

乎遊聖代觀國光目睨凌烟而頌聲不作某不揣賤劣
有疊然之志輒盡所蓄各為讚一章上以見王業之艱
難中以明聖賢之相須次以朗前哲之光韻末以聳後
人之誠節侯君集張亮負勲跋扈自陷大逆敢沒其名
用彰天刑使伐勞懷貳者懼春秋之義異姓為後故以
河間元王為讚首云

河間王孝恭

太極構天本由一氣大人創業資我族類堂堂河間仁

勇是經通駁有聲為唐宗英暴隋天亡羣盜猖狂我伐
用張時維哲王武有烈光為爪翼肺腸經綸八方自南
徂東晏海澄江平蕭銳
輔公祐使父兄帝天下化家為邦用竭
爾力寵臻其極言不伐色不德以遜以默柔嘉惟則佐
高祖建大勳如周旦奭與太宗守大成如漢間平宜君
宜王磐石無疆

房梁公玄齡

梁公先覺龍卧待君長
彗流光掃天布新義
師雷動公

躍其鱗杖策千里來排帝閭
婉婉梁公實懿實聰實光
實融羽義翼忠若鸞若鴻
大風動地儒服從容靜運
胸中弛張折衝左右太宗
夷屯廓蒙定高祖功功告
武成翊開太平我心雖勞
時靡有爭網羅遺賢推轂
羣英玉不韜輝蘭無沉馨
飛鴻出冥振鷺在庭濟濟
多士太宗以寧公無事矣
闕袞有補惟仲山甫經營
四方方叔召虎大邦鈞軸
至則委汝閒居台輔撫謙
自處亦莫敢侮高朗令終
嗚呼梁公

杜萊公如晦

穆穆萊公竒姿粹靈蘊元和氣為大國楨乘時能恢唐
室大開故人相攜

公與房梁公司
有匡濟之志也

直上泰階更為陰陽

迭作日月佐明四方贊育萬物王度是欽如玉如金德
音悃悃萬有千古永稱房杜如周申甫

魏鄭公徵

堂堂魏公崇節大志喬幹直聳摩天自致遭風雲時得
霸王器一言委質有死無二撫我則后各盡其志

嘗仕
李密

隱太
子 浮沉變通龍戰既息皇建其極俾補衮職其繩則

直諤諤疑疑危言正色保太宗德弼違替否日月不蝕

黜漢霸雜行周王道
人亦有言秉德不撓

與封德
彝庭論

禮興

樂崇德洽道豐保合太和昭明有融起四年中復三代
風言出化成神哉厥功尹躬佐商有恥於湯公以其心
匡扶聖唐為唐宗臣致唐無疆致唐無疆永式萬邦

長孫趙公無忌

趙國之先發祥朔土乃祖乃父受天之祐有女而聖

文德

皇_后為天下母有子而賢為唐室輔聖賢同氣千載一覩
不顯趙公允武允文克忠克仁實有大勲高祖受命太
宗歸尊翼翼乾乾恪居於藩羣孽亂嗣爭窺神器鴻業
將墜公揭大義一匡天下人到於今家受其賜帝將傳
聖爰有顧命汝忠汝誠莫與汝京與我聖子守唐太平
公相高宗有太宗遺風刑措財豐八荒來同和氣大融
妖星襲月禍起中宮公將正之以玉帝躬

武氏謀位
公以力爭

屈羣邪誠阻天聰黜非其尤令問無窮

唐莒公儉

歲寒陰凝冰雪皚皚有鳥擇木先陽春來誰與莒公王
佐之材間運未開登潛龍臺代萬姓請命與天為媒扶
龍而興振起雲雷權輿帝圖經始唐基始覆一簣勃然
巍巍易失曰時難知惟幾知幾其神莒公元勲

劉渝公政會

河出崑崙來潤中夏連山合沓橫擁其派巨靈勃然手
折太華決流東注功並造化粵我聖唐將舉晉陽帝命

是將往拯溺於四方亦既載旆亦既秉鉞強兇當路王威

高君雅

拒不得發渝公慷慨感義激節用奇制變大事立

決雷奮電越天衢八達則莫我敢遏如巨靈破山河勢
始豁赫矣渝公與神齊烈跡如仙掌炯炯不滅

李衛公靖

有隋之末羣盜熾燕帝怒震發五星從太白煥昭參野
將有聖人兵定天下金精下射猛毅感激李公矯矯從
此奮跡躍於中原王者則獲壯士不死

初公不利於我
帝欲戮之壯其

言而免壯士公自稱

唐威載赫帝曰汝傑致天之罰手付金鉞俾

往式遏不庭則殺如飈發發如火烈烈摧枯爍雪應鼓
如截遠若荆巫險若江湖強若匈奴莫不率從莫不震
恭車書混同氛祲蕩空衛侯之功功則維何威明惠和
策勇駕智長驅仁義仁義曠蕩帝王之將萬古曷瞻鐵

山巉巉

詔築墳闕象鐵山積石山

李英公勳

橫流莫極大亂無象英公傑出應運為將與楚楚霸與

漢漢王天時人事隨我所向長蛇縱蠱

王充

東據河洛婁

婁封承

建德

來濟同惡號吼連聲如雷如霆萬里震驚時

維英公諒我太宗斬承以鉞取蛇於穴羣穢殄滅乃定

九鼎乃開明堂奄有大邦金甲同光告成於皇

太宗獻捷於高

祖與勳俱擢金甲為上下將

皇業用昌帝命英公北伐殲獫雷鼓殷

殷旄頭幾殞掃雪黑山布唐陽春五原草綠不見南牧

島夷未庭天子親征其鋒維英莫拒莫抗是震是蕩破

東海浪天下既和解鞍投戈袞服委蛇華髮皤皤終始

三朝無玷可磨

劉夔公弘基

夔公崢嶸金虎之精應時而生與運俱行總帝元戎震
唐天聲瞋目張膽前無金城別建龍節中分虎旅啟行
萬里乘氣一鼓劍揮雷霆旆卷風雨先馳咸陽鏢定天
府天府既定唐集大命入揚王庭出權兵柄薄伐獫狁
朔風不競征徂島夷東海如鏡義始忠卒元勲之盛

長孫邵公順德

泰山未明雲鬱幽崖日觀赫開舒為丹霞昔我太原賢
傑潛屯帝出於震爛其盈門邛公炳焉實耀其間功參
造化謀協先天孰爰前驅捧轂南轅以勞以舊佐命之
元

虞永興公世南

英英永興華德素行以文富國以道佐命天下既平為
唐儒宗東觀石渠始出古風秉精繹思假道書圖馳騁
百代出入三古問義皇心聽堯舜語歸來帝側獻可替

否帝告永興與鴻碩之倫闡六籍三墳建樂章禮大先
師是宗先聖是崇於廓辟雍辟雍沉沉天子所臨或絃
或歌講古述今其徒八千纓弁森森獬豸鬚威詠德
音羽林孤兒亦垂青襟洋洋聲教無遠不洎日月所照
皆成文字鬱開古始掃蕩澆季實我羣儒成太宗之志
英英永興宜曰文懿

公謚

尉遲鄂公敬德

沈沈鄂公百鍊龍鋒沉翳未宣氣衝斗間佩非其人

初事

宋金剛

躍入大川神武獲焉提之上天天地之內指麾無

前熊威虎力隱若敵國剛毅木訥安劉必勃武德之屯

手拔禍根掃除氛昏捧出白日耀於天門功成名遂高

謝戎事烈烈猛志化為和氣深地高堂頤性保常屑瓊

飲露靜奏清商商為臣勵事君鄂公之志之仁

貞觀後公不交

人事常鍊氣服食奏清商樂以自奉

蕭宋公瑤

隋氏不君忠賢莫用桐生朝陽有集惟鳳捨彼頽屢鬱

為新棟路車玄袞開國有宋武德之暮羣孽內蠹巍巍
宋公聳節高步不吐不如不來不去屹岨中立為天一
柱從容而言社稷遂安持誠秉忠光輔二君激濁揚清
欲人如身道至廣莫我敢羣境至大不容纖塵雪山倚
空冰壑照人耿介絕鄰為唐貞臣

張郊公公謹

有倬郊公屹屹而貞泱泱而仁實太宗信臣太宗守藩
內難未夷圖之則安捨之則危帝臨安危機以懼以疑

以著為有知是莖是咨鄭公嶷然排闥折著抗憤正詞
用人事定天意身為元龜不知不識順義之則以定社
稷鄭公之力公之云亡帝念其勤若痛在身天懷發中
哭不避辰君臣之間復古未聞

屈突蔣公通

五運相推土火草期隋化為唐忠臣不知猶驅義徒奮
拒王師指心誓天摩頸待時人歸有德四海皆叛春日
滿川孤冰未泮亡家殉國方寸不亂力屈勢窮排空落

翰東南慟哭血盡魂斷杖忠就擒萬國瞻漢帝曰爾通古之烈士孝於其親誰不欲子俾侯於蔣授以師紀感恩不死宣力如彼佐唐扶隋名教之美

高申公士廉

維嶽降神佐唐生申忠貞自天孝友如春德為邦基行厚人倫肅肅雍雍真王者臣慶因歸妹光延天配

文德皇后

之同出也

婚媾之中雲龍潛會建公南海廓我無外諒武撥

亂弼文開泰遏彼庸蜀荐鍾澆季文翁之化若掃於地

申公攸徂有教無類父子兄弟望風相媿勃興儒雅大
復禮義西南頌聲到今未墜名登元勲理冠羣吏全材
大器於鑠厥懿

殷鄖公開山

溫溫殷公初若懦夫銅印試吏褒衣為儒大風驅雲忽
與之俱遭逢真宰參造化謨天地既闢厥功有赫從王
龔行佐帝光宅遠展驥足高揮鳳翮以永終譽垂於竹帛

秦胡公叔寶

洛汭之役龍戰未決

我師與王充陣於九曲

秦公應變臨陣雷拔

銳氣盡來我盈彼竭成敗反掌存亡奄忽虎來風壯鼇
轉山沒遂作心膂爰從討伐崩圍陷陣火迸冰裂翕如
鶚聳縱若鯨突功成國定萬古壯骨

程盧公知節

盧公倬然動軼幾先轉禍為福

與秦胡公降於九曲

攀龍上天續翻鵬

翼積風乃聳桓桓將軍大敵則勇雷崩山谷獵虎頓伏飈倒
溟波鯨鯢蹉跎見危而進當死不讓干城三朝身老氣壯

段褒公志玄

褒公虎臣先運而臻謁帝太原許唐與身擁劍駕氣騰
風躍雲積忠累仁光有厥勲建旆北伐細柳宵屯風謐
霜凝嚴扃達晨天子之使駐車軍門軍屯肅章門外壁門以夜不納制使
安衆秉威此真將軍洸洸桓桓克壯有聞

許譙公紹

羣動相食血流中原譙公夷陵豺虎與鄰列境連城火
炎烟昏皎其一邦如玉不焚三光忽開萬象皆新誰有

天下平生故人

公與高祖有舊

引忠歸誠豹變獲伸金石之契

移為君臣奕奕煌煌為龍為光元戎啓行大旆央央式
遏大江奄征南方恩斯勤斯兩不可忘

皇帝親庶政頌

并序

臣聞光宅大寶茂育羣生神而明之必在上聖然則所
同者道所異者時或以垂拱仰成或以勵精自致及乎
俗躋仁壽理洽時雍弛張之政不殊勞逸之功則倍我
皇帝體至化含元精苞乾剛履坤順誕膺駿命恢纂鴻

休宣八聖之重光集百靈之典祉如天之憐如地之容
鼓義為雷霆奮仁為風雨幹璿衡而轉七曜懸金鏡而
納九圍廓氛沍而川澄沓禎祥而山委昔軒轅氏斬蚩
尤滅火帝功至大矣若非仗風后之助受玄女之符未
能克也陶唐氏誅四罪定水災德至厚矣若非大舜之
登庸伯禹之盡力未能成也湯以伊尹為相始定殷功
武以太公為師乃康周道高宗紹復資傅說啓沃之言
宣王中興賴山甫將明之政今陛下大康四海雄軼二

紀百姓不知其日用羣臣無望於清風而乃業邁乎前
王功高乎古烈聖作物觀孰知其源竊以管窺天倪蠡
挹溟量庶乎大畧可得而言焉陛下自代天統物之初
則以屈己濟人為意處臨庶政躬總萬區四冊賢良六
親郊祀勤恤於物本盡瘁於生靈詳曠代之所未詳慮
列辟之所未慮夏景大而方食寒星在而求衣寸陰不
捨於論思子夜猶觀乎啓事除一物之患而品類獲安
伸匹夫之冤而庶獄自息棄瑕而錄用含垢而宥過小

善可紀必拔於宸衷片言有孚不忘於睿聰至如天時之豐約地利之夷險邦賦之盈虛師律之貞暴閭閻之疾苦稼穡之艱難人風之情偽吏理之得失莫不密歸神算潛納皇明雖陰陽不能以氣欺雖鬼神不能以形遁何細而不及何大而不苞何祕而不彰何難而不就猶復登臺念在陰之慘聞樂思向隅之情御裘感短褐之寒臨膳憂簞食之餒日慎一日既泰而不自泰既安而不自安兢兢乎業業乎此其所以廣運而有成全功

之克舉者也然而感覆幬之恩者欲天之彌高荷容載
之德者欲地之彌厚仰照臨之明者欲日月之彌光微
臣被淳風飲玄澤親挹行事目覩升平憂勞誠難願陛
下勉之而已美善誠至願陛下保之而已若夫雖休勿
休玄默優柔君上之體也適觀厥成蹈舞頌聲臣下之
職也為而不有德莫至焉知而不稱罪莫大焉臣某敢
昧死再拜稽首獻皇帝親庶政頌一首其詞曰

士師邁德玄元儲慶幽而復曜高祖受命貞觀致理開

元殷盛艱而復康皇帝親政受命維何邈斯萬年親政
維何夕惕朝乾天道福謙我則奉天人生在勤我則率
先憂堯之心勞禹之形求人之瘼思國之經年亦豐止
御膳不馨夜如何其皇寢未寧偃武修文太和氤氲海
不揚波天無纖氛鳥章之長椎髻之君會朝明庭其從
如雲巍巍崇崇於穆昭融宜播大樂以宣皇風鏗鏘盛
德蹈舞神功下臣作頌永示無窮

狄梁公立廬陵王傳讚

并序

梁公以武氏篡盜國命如綴翊安宗社非我而誰是用
蒙大恥履大險聳節振義以持世心開高祖天下於方
寸之地盜力雖盛莫之敢闕唐復為唐繫公是賴後代
昧者頗歸功於五臣殊不知五臣之功公所授也客有
以李北海所傳示予者述廬陵廢立之際見公如生貽
諸將來可以不感敢據憤而讚之詞曰

於休梁公社稷之臣濡跡應變與唐屈伸妖虹橫天鳴
北專晨獨立大道指南生人闡闢有期命先我時乃建

國本代天張機取日虞泉洗光咸池潛授五龍夾之以
飛臨終指麾皇業再基運起身後功成不知穆若清風
巍然宏規凡為臣者可不度思

張荊州畫讚

井序

中書令始興文獻公有唐之鯁亮臣也開元二十二年
後玄宗春秋高矣以太平自致頗易天下綜覈稍怠推
納寢廣君子小人摩肩於朝直聲遂寢邪氣始勝中興
之業哀馬公於是以生人為身社稷自任抗微言而無

所避秉太節而不可奪小必諫大必諍攀帝檻歷天階
犯雷霆之威不霽不止日月幾蝕爲公却明虎而冠者
不敢猛視羣賢倚賴天下仰息廩廩乎千載之望矣不
虞天將啟幽薊之禍俾姦臣乘釁以速致戎詐成讒勝
聖不能保褫我公袞寘於侯服身雖遠而諫愈切道既
塞而誠彌堅憂而不怨終老南國於戲功業見乎變而
其變有二在否則通在秦則窮開元初天子新出艱難
久憤荒政樂與羣下勵精致理於是乎否極之變姚宋

坐而乘之舉爲時要動中上意天光照身宇宙在手勢
若舟楫相得當洪流而鼓迅風崇朝萬里不足怪也開
元末天子倦於勤而安其安高視穆清沛然大滿於是
乎有秦極之變荊州起而扶之舉爲時害動拂上欲日
與讒黨抗衡於交戟之中勢若微陽戰陰衝密雲而吐
丹氣歛輝而滅又何歎乎所痛者逢一時事一聖踐其
跡執其柄而有可有不可有成有不成況乎差池草茅
沉落光耀者復何言哉復何言哉曹溪沙門靈澈雖脫

離世務而猶好正直攜其圖像因以示余余觀而感之
乃作銘曰

唐有棟臣往矣其邈世傳遺像以覺後覺德容恢晏天
骨峻擢波澄東溟日照太嶽具瞻崇崇起敬起忠貌與
神會凜然生風氣蘊逆鱗色形匪躬當時曲直如在胃
中鯤鱗初脫激海以化羊角中顏摩天而下無喜無愠
亦如此畫嗚呼為臣傲爾夙夜

續羊叔子傳讚

天厭鼎峙蜀滅魏改錫晉羊公以同四海儒衣登壇嶽
鎮荆蠻十萬之衆從公而閑逍遙峴陽傲視勍敵用仁
為間出入無跡吳國雖守吳心已降吞於胸中不見大
江勤物忘已樂天知命留功遺人國愈身病江漢舊域
德膏潛蒸化行兵中兵息化興策雖平吳道不相晉永
嘉南遷豈曰泯泯

藥師如來繡像讚

并序

藥師如來像者余妻蘭陵蕭氏之所繡也貞元二十年

余奉德宗皇帝之命西使吐蕃辭高堂而出萬死介單
車而馳不測國故遽至戎情猜閉坎險一遇星霜再周
夫人盥饋之餘膏鉛不御日亂蓬首坐銷薜華異域無
期良時自晚始怨冬釭之久而紅芳已闌方苦夏景之
長而碧樹將落書委塵篋跡淪苔階漸昧音容孰知存
沒黷龜不告因夢難徵觸慮成端沿情多緒黃昏望絕
見偶語而生疑清旭意新聞疾行而誤喜循環何極刻
舟匪尋浩隔理求宵非計得如聞東方有金界極樂大

雄散琉璃之寶光照恒沙之國土能度衆生出諸幽厄
一念必應萬感皆通是用濬發慧根妙求真像斷鳴機
躬織之素染懿筐手續之絲盡瘁莊嚴彰施綵繡纏苦
心於香縷注精意於針鋒指下而露染青蓮思盡而雲
開白月然後練時潔室華設珍供夕炬傳照晨爐續烟
齊獻至誠泣敷懇願遂得慈舟密濟覺路潛引當道場
發念之日是荒裔來歸之辰幽感冥符一何昭焯乃知
織迴文之錦無補離憂登望歸之臺空為廢日與夫心

諧妙理手結勝因進則有濟度之功退不離清淨為本
從長擇善豈同日而言哉余感其志効爰用贊序雖在
妻子亦無媿詞藏諸閨門永以傳信讚曰

地萬里兮天一極往無由兮來不得解脫願兮慈悲力
五色繡兮黃金飾澄氛昏兮圓相開湛水月兮蓮花臺
慈眼睺兮獷心迴死別離兮生歸來海為田兮劫為灰
貝念念兮無窮哉

呂衡州集卷九

欽定四庫全書

呂衡州集卷十

唐 呂溫 撰

雜著

功臣恕死議

昔衛蒯聵以竊國之詐盟其陪臣服冕乘軒三死無與
近代惑者因為口號於是乎有功臣恕死之典考諸古
訓其異端歟稽諸時事其亂本歟何者有國之柄莫大

乎刑賞人生有欲不可以不制天討有罪不可以不刑
蓋刑者聖王時以佐道德而齊天下者也功濟乎物不
可以不賞賞勸乎功不可以不信蓋信者聖王所以一
號令而惇天下者也然則起死之典棄信而廢刑何以
言之夫立功者自八元十亂之後非盡能賢或有起屠
販壟畝行陣之間乘帝王應天順人之勢用力無幾遂
貪天功超騰風雲各得變化率勞怙寵屈強自負僭冒
無厭見利忘義是宜崇威峻法大為之防而反丹書鐵

券許以不死其功大者可以五作亂而十犯上孰不以

暴為無傷乎且人君之言如渙汗不反既與之要天地

誓河山卒

倉忽反

一旦失馭有黜韓之罪神怒人怨不得

已而誅是棄信也若恣行兇險隳窳憲綱或姦鋒將發

釁逼宗社乃念斯言之玷忍而不誅是廢刑也向者纔

得其塵涓之効螢燭之助而信棄刑廢將焉用之使賢

而有功驚寵懼滿自居無過之地何怨死為使愚而有

功已小人不幸又告以無死是增驕而啟姦適所謂賞

之禍也雖恕之死其能免乎夫其賢如太公忠如伊尹
唯君知臣可以勿貳而遽宥以死罪是疑其不終非所
以待之以誠而盡君子之心若乃猾如狗盜庸如黥徒
未有罪而先恕之死是不許其慕生廉恥自固名節非
所以導之以德而勸小人之善也以為明君之處勞臣
也安之以爵祿護之以紀律明之以好惡聳之以禍福
使得遷善遠罪保勲全名剖符傳慶與國終始思斯勤
斯是亦極矣奈何撓權亂法以罪寵人墜信賞必罰之

典虧昭德塞違之道恐非哲王經邦軌物之制也謹議

復漢以粟為賞罰議

議曰先王賞以飾喜罰以飾怒喜必待功而賞不僭行怒苟得罪而罰無輕赦其來尚矣漢氏雜霸道而隳王制昧宏規而徇小利俾其納粟除罪拜爵以罰人則廢法以賞人則廢功以儲蓄則廢本是沮勞惠姦而怠棄南畝也何以言之惟名與器不可假人而班爵於并兼之家析圭於滯積之室使屠沽賤隸凌駕英豪苟有懷

廉恥之心豈復致患難之死雖月要天地日誓山河而賞不足以勸矣天討有罪刑茲無赦而撓權於殘賊之徒屈法於姦宄之黨使兇人酷吏言暴無傷苟開必免之門孰懲罔極之惡雖臨以斧鉞驅於鼎鑊而刑不足以威矣且朝縻好爵以粟授受國有常刑以粟出入貪利愛生之夫孰不願空壘畝而貿圭組竭倉廩而救死亡拜爵者坐等封君遂忘其本業免罪者室如懸磬曷保其生聚雖使三公九卿躬執耒耜而嗇不可以務矣

於戲賞罰者長人之大柄農耆者有國之永圖忽而棄
焉曾不是念而利乎國儲之暫實兵食之僅濟其何補
歟然而漢承秦弊中國耗高惠務厥完輯孝文守以
恭儉德未浹於海外威未行於四夷邊候猶聞擊柝戎
士不得解甲晁錯是以有權宜之對救弊之術偷利於
當代幸成於一時雖曰有因而為終貽識者之誚國家
體元立極繼天而作騰軼殷周紹休唐虞率我蒸人登
於壽域王一變至於帝帝一變至於皇非正大之謨不

聽非盛德之事不問焉有習近古之失策採庸臣之詭
論者哉必患國廩猶虛邊餽莫繼莫若興李愬之平羅
務充國之屯田練將簡兵以省軍費輕徭薄賦以悅人
心東作一興西成再秩則太倉之粟如京矣塞下之稼
如雲矣亦何必虧昭德塞違之道墜信賞必罰之典恐
非盛唐經邦軌物之制也謹議

人文化成論

易曰觀乎人文以化成天下能諷其言蓋有之矣未有

明其義者也嘗試論之夫一二相生大鈞造物百化交錯六氣節宣或陰闔而陽開或天經而地紀有聖作則實為人文若乃夫以剛克妻以柔立父慈而教子孝而箴此室家之文也君以仁使臣臣以義事君予違汝弼獻可替否此則朝廷之文也三公論道六卿分職九流異趣百揆同歸此則官司之文也寬則人慢糾之以猛猛則人殘施之以寬寬以濟猛猛以濟寬此刑政之文也樂勝則流遏之以禮禮勝則離和之以樂與時消息

因俗變通此教化之文也文者蓋言錯綜庶績藻繪人情如成文焉以致其理然則人文化成之義其在茲乎而近代諂諛之臣特以時君不能則象乾坤祖述堯舜作化成天下之文乃以旂裳冕服翰墨章句為人文也遂使君人者浩然忘本沛然自得盛威儀以求至理坐吟詠而待太平流蕩因循敗而未悟不其痛歟必以旂裳冕服為人文則秦漢魏晉聲明文物禮縟五帝儀繁三王可曰煥乎其有文章矣何衰亂之甚也必以章句

翰墨為人文則陳後主隋煬帝雍容綺靡洋溢編簡可
曰文思安安何滅亡之速也覈之以名義研之以情實
既如彼校之以今古質之以成敗又如此傳不云乎經
緯天地曰文禮不云乎文王以文理則文之時義其大
矣哉焉可以名數末流雕蟲小技厠雜其間也

三不欺先後論

昔宓子賤為單父也人不忍欺之國僑為鄭也人不能
欺之西門豹為鄴也人不敢欺之此皆為政不同同歸

於理作幹事之稱首貽牧人之經範汪洋古今輝焯圖
史窮理而語故有優劣擇善而行豈無先後請試論之
子賤仕哀亂之魯而邑偏強齊仗義為城池倚仁為干
櫓當鯨吞之大敵鳩狼顧之遺黎渙離形檢妙用心術
惠訓不倦乃無得而稱視民如傷而不有其愛感而動
之陰陽運於無言誠而明之日月懸於方寸是則不求
不欺於人而人不忍欺矣子產攝晉楚之間而靖恭爾
次役智利物飾躬勵俗守之以信行之以禮告之以慈

惠臨之以明察如鏡洞照如衡誠懸是則求人不欺而人亦不能欺矣西門豹當戰國之初而克修茂績身有紀律言有典章剛包其柔威克厥愛權之以法制董之以刑罰火烈人望霜清物心是則責人不欺而人固不敢欺矣夫不忍欺者至誠潛感是曰上德堯舜之吏也不能欺者明智旁達是曰有政三王之吏也不敢欺者嚴威允濟是曰能刑五霸之吏也誠不足至於智智不足至於威大小之間朗然可見然而事在折衷理資漸

致德宜全舉道貴兼通必也修誠而棄智誠未至而致理或虧任智而廢威智未周而暴亂將起不若總而行之迭收其效一之日二之日刑明威立使人畏而不敢欺三之日四之日智達政成使人敬而不能欺五之日六之日志孚誠格使人感而不忍欺以寬濟猛同二氣而和平自邇陟遐比三才而具美苟非全德大器其孰能至於此乎若不暇會其源流統其宗極而姑定優劣直論先後則堯舜之吏與王霸不同年而語矣

號州三堂記

應龍乘風雲作雷雨退必蟠螭以全其力君子役智能
統機劇退必晏息以全其性力全則神化無窮性全則
精用不竭深山大澤其所以蟠螭乎高齋清池其所以
晏息乎號州三堂者君子晏息之境也開元初天子思
二南之風並選宗英共持理柄號大而近匪親不居時
惟五王出入相授承平易理逸政多暇考卜惟勝作為
三堂三者明臣子在三之節堂者勵宗室克構之義豈

徒造適實以垂訓居德樂善何其盛哉然當時漢同家
人魯用王禮棟宇制度非諸侯居後刺史馬君錫因其
頽侈始革基構豐而不侈約而不陋以琴竹詩書之幽
素易綺紈鐘鼓之繁喧惟林池烟景不讓他日觀其廣
踰百畝深入重扃迴塘屈盤沓島交映溟渤轉於環堵
蓬壺起於中庭浩然天成孰曰人智及春之日衆木花坼
岸鋪島織沈浮照耀其水五色於是乎襲馨擷奇方舟
逶迤樂魚時翻飄藥雪飛泝環迴隱映差池咫尺迷

路不知所歸此則武陵桃源未足以極幽絕也夏之日
石寒水清松密竹深大柳起風甘棠垂陰於是乎濯纓
連漪解帶升堂畏景火雲隔林無光虛薨沈沈皓壁如
霜羽扇不搖南軒清涼此則楚襄蘭臺未足以滌炎鬱
也秋之日金飈掃林蓊鬱洞開太華爽氣出關而來於
是乎絃琴端居景物廓如月委皓素水涵空虛鳥驚寒
沙露滴高梧境隨夜深疑與世殊此則庾公西樓未足
以澹神慮也冬之日同雲千里大雪盈尺四眺無路三

堂虛白於是乎置酒褰帷憑軒倚楹瑤階如真玉樹羅
生日暮天霽雲開月明冰泉潺潺終夜有聲此則予猷
山陰未足以暢吟嘯也於戲不離軒冕而踐夷曠之域
不出戶庭而獲江海之心趣近懸解跡同大隱序閱四
時之勝節宣六氣之和貴而居之可曰厚矣若知其身
既安而思所以安人其性既適而思所以適物不以自
樂而忽鰥寡之苦不以自逸而忘稼穡之勤能推是心
以惠境內則良二千石也方今人亦勞止上思又息州

郡之選重如庭臣由是南陽張公輟揮翰之任受剖符之寄遊刃而理此馬坐嘯靜政令若水木閑人民若魚鳥馴致其道闇然日章小子以通家之愛獲拜牀下且齒諸子侍坐於三堂見知為文不敢無述捧筆避席請書堂陰俾後之人知此堂非止燕遊亦可以觀清靜為政之道云

諸葛武侯廟記

天厭漢德俾絕其紐羣生墜塗四海飛水武侯命世實

念皇極魏姦吳輕去聲未獲心膂胥宇南陽堅卧待主三
顧稍晚羣雄初定必也彗掃是資鼎立變化消息謀成
掌中戰龍玄黃再得風雨於是右揭如天之府左提用
武之國因山分力與水合勢蟠亘萬里張為龍形亦欲
首吞咸鎬尾束河洛翼出中夏飛於天衢然後魚驅勾
吳東入晏海大勲未集天奪其魄至誠無妄炳在日月
烈氣不散長為風雷英雄痛心六百年矣於戲以武侯
之才知己付託土雖狹國以勤儉富民雖寡兵以節制

強魏武雖沒晉宣非敵而戎車荐駕不復中原或曰奇
謀非長則斬將覆軍無虛舉矣或曰餽糧不繼則築室
反耕有成算矣嘗試念之頗蹟其原夫民無歸德以為
歸撫則思虐則忘其思也不可使忘其忘也不可使思
當漢道方休哀平無罪王莽乃欲憑寵戚造符命脅之
以威動之以神使人忘漢終不可得也及高光舊德與
世衰遠桓靈流毒在人骨髓武侯乃欲開張李世興振
絕緒諭之以本臨之以忠使人思漢亦不可得也向使

武侯奉先主之命告天下曰我之舉也匪私劉宗唯活
元元曹氏利汝乎吾事之曹氏害汝乎吾除之俾虐魏
偪從之民聳誠感動然後經武觀釁長驅義聲咸洛不
足定矣奈何當至公之運而強人以私此猶力爭彼未
心服勤而靡獲不亦宜哉乃知務開濟之業者未能審
時定勢大順人心而克觀厥成吾不信也惜其才有餘
而見未至述於遺廟以俟通識唐貞元十四年七月二
十五日東平呂某記

附道州刺史廳壁記

刺史河南元結字次山撰

天下太平方千里之內生植齒類刺史能存亡休戚之
天下兵興方千里之內能保黎庶能攘患難在刺史耳
凡刺史若無文武才畧若不清廉肅下若不明惠公直
則一州生類皆辱災害於戲自至此州見井邑丘墟生
民幾盡試問其故不覺涕下前輩刺史或有貪猥懦弱
不分是非但以衣服飲食為事數年之間蒼生蒙以私

欲侵奪兼之公家驅迫非姦惡強富殆無存者問之耆老前後刺史能恤養貧弱專守法令有徐公履道李公虞而已徧問諸公善或不及徐李惡有不堪說者故為此記與刺史作戒自置州以來諸公改授遷絀年月則舊記存焉

道州刺史廳後記

壁記非古也若冠綬命秩之差則有格令在山川風物之辨則有圖諫在所以為之記者豈不欲述理道列賢

不肖以訓於後庶中人以上得化其心焉代之作者率異於是或誇學名數或務工為文居其官而自記者則媚已不居其官而代人記者則媚人春秋之旨蓋委地矣賢二千石河南元結字次山自作道州廳事記彰善而不黨指惡而不誣直舉胃臆用為鑒戒昭昭吏師長在屋壁彼貪虐放肆以生人為戲者獨不媿於心乎予自幼時讀循吏傳慕其為人以為士大夫立名於代無以高此前年冬由尚書刑部郎中出為此州雖苦劇自

課而未能逮其意也往刺史有許子良者輒移元次山
記於北牖下而以其文代之後亦有時號君子之清者
蒞此孰視焉而莫之改豈是非之際如是其難乎予也
魯安知其他即命丐而書之俾復其舊且為後記以廣
次山之志云

湖南都團練副使廳記

湘中七郡羅壁上流右振捍蠻左馳甌越控交廣之戶
牖扼吳蜀之咽喉翼張四隅襟束萬里半天下安危係

馬聖唐理雖偃草制不去備消息變化必惟其時由是
剖分荆衡復古南鎮控其兵徒而重其統帥易其將校
而難其叅佐所以顯仁藏用明道晦權成師於禮樂之
中講武於文章之內雍容易簡四十餘年名跡風流冠
於當代始則裴諫議虬以逸材奇畧傲視而靜荒寇次
則趙相公璟以高標雅望鬱起而為國楨其餘馮郎中
嶷之碩重房容州孺復之英達鄭評事冽張著作李文
之美秀洎張和州惟儉盧侍御澥佐我先大夫宣慈明

允實有成績是皆焯於朝論清在人謠者矣元和三年
冬天子命御史中丞隴西李公以永嘉之循政京兆之
懿則廷錫大旆俾綏衡湘威如秋霜無私凋惠如冬陽
無私煦用人如止水無私鑒始下車表前副使殿中侍
御史扶風竇君常字中行以本官復職於是監察御史
河南穆君寂河內司馬君紆范陽盧君璠太常協律郎
河東范君存慶前咸陽尉吳郡顧君師閔前太子正字
隴西李君礎前太常寺奉禮郎京兆杜君周士前延陵

縣尉同郡杜君賞羣材響附各以類至文雅器用歲餘
大備錯金碧於晴壑絳孔翠於春林遐邇翕然稱爲盛
府中行感會知己竭其誠能黃鐘音韻調於嶰谷之竹
太阿鋒鋌拭以華山之土其集鸞鳳斷犀兕不足怪也
竇氏伯季同時七人一居方伯二列華省四在諸侯之
館名教之樂縉紳慕焉以某近守支郡且知故實得請
連帥俾書公堂媿於不文安敢堅讓元和五年七月五

日東平呂某記



呂衡州集卷十